

三國志通俗演義

卷之十一

I242.4

1

三國志通俗演義卷之十一

目錄

周瑜南郡戰曹仁

諸葛亮一氣周瑜

諸葛亮傍畧四郡

趙子龍智取桂陽

黃忠魏延獻長沙

孫仲謀合淝大戰

周瑜定計取荊州

劉玄德娶孫夫人

錦囊計趙雲救主

諸葛亮二氣周瑜

三國志通俗演義卷之十一

晉平陽侯陳壽史傳

後學羅本貫中編次

周瑜南郡戰曹仁

却說孔明欲斬雲長。玄德乃告之曰。昔吾弟
兄三人結義之時。誓同生死。今日兄弟犯法。
固當死罪。奈何違却前盟。望權記過。後將功
贖之。衆皆哀告。孔明方纔饒了。却說周瑜收
功點將。各各類功申報吳侯。所得降卒盡行

發付渡江。賞勞了畢。遂進兵攻取南郡。

即江陵也。

前隊臨江下了寨。後分五營。周瑜居中。瑜與

魯肅程普共議玄德之事。軍士報覆。劉玄德

使孫乾來與都督作賀。瑜命請入。乾施禮畢。

言主公特命乾再拜都督大德。輒有薄禮上

獻。瑜問曰。玄德在何處。乾答曰。見移兵屯油

江口。

今時江陵管下公安縣是也。

瑜驚曰。有孔明否。乾曰。

敢有在彼。瑜曰。足下先回。某親來相謝也。瑜

納了禮物。孫乾先回。肅問瑜曰。却纔都督為

何失驚。瑜曰。劉備屯兵油江口。必有取南郡之意。我等費了許多軍馬。用了許多錢糧。害了許多生靈。眼覷南郡反手可得。彼等心懷不仁。要就見成。須放着周瑜不死。肅曰。當何策退之。瑜曰。我自去和他說話。若應允得。便罷。如不應允。未及他取南郡。先結果了劉備。肅曰。某願同往。周瑜魯肅引三千輕騎。迤投油江口來。却說孫乾回見玄德。說周瑜親來相謝。玄德乃問孔明曰。來意若何。孔明笑曰。

那裏為這些薄禮肯來相謝。止為南郡而來。玄德曰。若提兵來。若何。孔明曰。他來便可如此。如此應答。玄德已知會了。孔明於油江口擺開戰船。岸上就列許多軍馬。人報周瑜引兵到來。孔明使趙雲領數騎來接。瑜見軍勢雄壯。心甚不安。行至營門外。玄德孔明接着。請到帳中。各敘禮畢。兩邊對坐。玄德舉酒頻以美言致謝。鑒兵之事。酒至數巡。瑜曰。玄德公移兵在此。莫非有取南郡之意否。玄德曰。

聞知足下欲取南郡。故來相助。若都督不取。備必取之。瑜笑曰。吾東吳久欲吞併漢江。今南郡已在掌中。如何不取。玄德曰。勝負不可預定。自古云。欺敵者亡。又俗語云。事無必取。曹操北歸。令曹仁守南郡等處。必有奇計。更兼曹仁勇不可當。但恐都督不能取耳。瑜曰。待吾取不得南郡。從公取之。玄德曰。子敬孔明在此為證。都督却休反悔。瑜曰。大丈夫一言既出。驢馬難追。何悔之有。孔明曰。都督此

言極是公論。古人云。天下者非一人之天下。乃天下人之天下也。先儘東吳去取。若不下。主公取之是也。有何不可哉。周瑜相辭。玄德送瑜上馬而去。回問孔明曰。却纔先生教備如此回答。雖一時間說了。展轉尋思。於理未然。劉備孤窮一身。四海無置足之地。若得南郡。權且容身。不爭先教周瑜取去了。城池已屬東吳矣。却如何得住。孔明大笑曰。當初亮勸主公取荊州。主公不聽。今日却想耶。玄德

曰。事已至此。無可奈何。孔明曰。不須主公憂慮。儘着周瑜去廝殺。早晚教主公在南郡城中高坐。玄德問曰。良計安在。孔明曰。只須如此如此。玄德大喜。只理會在江口屯劄。按兵不動。却說周瑜和魯肅回寨。肅曰。都督如何也。許玄德取城。瑜曰。吾彈指可得南郡。落的虛做人情。隨問帳下將士曰。誰敢先取南郡。一人應聲而出。乃蔣欽也。躬身上帳曰。某願取。瑜曰。汝為先鋒。可使徐盛丁奉為副將。撥

五千精銳軍馬。首先渡江。吾隨後以為應兵。蔣欽領兵去了。却說曹仁在南郡。先分付曹洪守夷陵。以為犄角之勢。深溝高壘。而不出戰。人報吳兵已渡漢江。必須迎之。仁曰。堅守勿戰為上。驍將牛金奮然而進曰。吳兵臨城而不出戰。是怯也。況吾兵新敗。若不重扶銳氣。軍皆墮也。願借五百軍士。某當決一死戰。仁從之。令牛金出馬。與丁奉更不答話。約戰四五合。丁奉敗走。牛金引五百軍士追趕入

陣。奉指揮五千軍一裹圍牛金於陣中。左右衝突。不能得出。曹仁在城上望見牛金困於垓心。慌教左右備馬。長史陳矯諫曰。丞相以重任托付將軍。牛金不聽約束。妄自出戰。以致如此。假使便棄此數百人。何苦將軍輕出而救乎。仁曰。不然。牛金一失。則南郡不可保也。遂披甲上馬。引麾下壯士數百騎出城。陳矯於城上助喊擂鼓。曹仁領兵離吳兵百餘步。逼於一溝之上。陳矯欲教曹仁只就那裏

住劄。遙與牛金為勢。只見曹仁大呼一聲。驟馬就飛過淺溝。衆皆奮力而過。仁獨當先。揮刀殺過吳陣。徐盛迎之。不能當抵。曹仁殺到垓心。救出牛金。仁回顧。尚有數十騎在陣。不能得出。遂復回突入重圍。所到之處。莫敢攔阻。又抹出這一虜軍馬。正遇蔣欽攔路。仁奮力衝散。牛金助威。仁弟曹純亦引兵出。混殺一陣。吳軍大敗。曹仁得勝。緩緩而回。陳矯等迎門接着。舉盃稱賀。將軍真天神也。却說蔣

欽兵敗。折軍數多。回見周瑜。瑜大怒。欲斬之。衆將告免。瑜即點兵。要與曹仁決戰。甘寧出曰。都督未可造次。今曹仁令曹洪據守夷陵。為犄角之勢。某願乞精兵三千。迺取夷陵。都督然後可取南郡也。瑜服其論。先教甘寧領三千兵。攻打夷陵。早有細作渡江。報知曹仁。仁慌與陳矯商議。矯曰。將軍若不救夷陵。則南郡必有失也。仁從之。遂令曹純。并騎將牛金。暗地領兵三千。救曹洪。純乃先使人報知。

入以救甘寧。周泰出曰。某願往。即時掉刀上馬。直殺入曹軍之中。迺到城下。甘寧望見周泰至。自出城迎之。共說都督自提兵至。寧傳令。教軍士嚴裝飽食。來日內應。却說曹洪曹純牛金共議甘寧之事。洪曰。即目周瑜兵至。怎生迎敵。牛金曰。先使人報南郡。然後某為先鋒迎之。洪遣人報曹仁。次日。吳兵至。鼓聲大震。曹兵迎之。比及交鋒。甘寧周泰分兩路殺出。曹兵大亂。吳兵四下掩殺。曹洪曹純牛

金果然投小路而走。亂柴滿道。馬不能行。盡皆棄馬而走。吳兵得馬三百餘匹。周泰驅兵日夜赶到南郡。正遇曹仁軍馬。兩軍混戰。天色已晚。各自收兵。且說曹仁到城中。與衆商議。曹洪曰。目前失了夷陵。勢已危急。何不拆開丞相遺計觀之。以解此危。曹仁曰。汝言正合吾意。遂拆書觀之。此計如何。且聽下回分解。便知端的。

諸葛亮一氣周瑜

却說曹仁拆開計策觀畢大喜。便傳令教五更造飯。平明大小軍馬盡皆出城。城上遍插旌旗。虛張聲勢。軍分三門而出。却說周瑜自救出甘寧。未及六日。陳兵於南郡城外。見曹兵分三門而出。瑜上將臺觀看。見女牆邊虛擡旌旗。無人守護。又見軍士腰下各束縛包裹。瑜心暗忖。曹仁必先準備走路。遂下將臺。號令左右。分布兩軍為翼。如前軍得勝追趕。只待鳴金方退。退步就教程普督後軍。吾親